




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

MATI 2018

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## O le Atua na To'ai Faa-l'a a Po O se Faitauga o le Esoto 12:12-13

*sauniia e*

**Brian Kolia**

Faiaoga o le Feagaiga Tuai  
Kolisi Faafaifeau i Malua

O Maturu i le Tala Faasolopito  
**Dietrich Bonhoeffer**  
(Titeriti Ponehofa)  
*(silasila itulau e 7)*

Silasila i le  
**POLOKALAME**  
**O LE FONOTELE**  
itulau e 12,13.

### O LE ATA

O le ata lena o le fale o le loane Viliamu i Apia, ua toe faaleleia ona o le anoano o mea na faaleagaina e le afa o Gita i le tausaga nei. E le'i mapuea mai le Ekalesia i le faafouga na fai, lea e tele foi tupe na alu ai, ae o lenei ua toe faaopopo mai manu'aga o le afa na aafia ai le atunuu i lenei tausaga. Tatou faamoemoe pea i le Atua.

1. Faatomuaga:

E lua upu o loo faamatalaina ai le afio ifo o le Atua i Aikupito i le

Esoto 12. O le upu *pasah* - sosopo, f13, ma le *abar* - ui ane, f12. Ae *faaauau itulau e 2*



### Tumutumu Mauga Amerika (Summit America)

Mai lou Faatuatua i le Atua, ma lou Talitonu i Taleni ua e maua mai le Atua, e mafai ai ona e A'ea soo se Lu'itau lua te Fetaia'i i le Olaga

### *O se tala mo Tupulaga Talavou*

“Aisea ua tupu ai ia te a'u lenei mea?” O le 'e'e lea a Toti a o taumafai lona tama e sii a'e lona

tino mai le vaituloto i luga o le vaaafi. Ua lavatoto uma le tino *silasila itulau mo Tupulaga Talavou p.8*

# O le Atua na To'ai Faa-I'a a Po

## O se Faitauga o le Esoto 12:12-13

### *mai le itulau muamua*

fia fesiligia le tulaga o i latou o loo aafia i le afio ane lea o le Atua. E le gata o Isaraelu, ae o nisi o leo o loo taotaomia i le tala. E faatupu manatu le muagagana: “To'ai faa-i'a a po.”(i) O le muagagana lava lea o le a faavae ai se faitauga o le Esoto 12:12-13. O se faitauga mai le vaaiga faa-Samoa: pe na ui ane faapefea le Atua i Aikupito? Pe “na to'ai faa-i'a a po” le Atua i Aikupito”

### **Fausiaina o le Ta'iala**

#### 2.1 Metotia Faitau

O lenei pepa, o le a faavae le ta'iala faitau, i le metotia o le “Reader Response Criticism.” O se metotia e faama'ite e le tagata faitau le fatuina o le uiga o le tala. E afua mai i le mafauauga fetala'i (theory) e ta'ua o le “Reception theory” na fausia e le tagata suesue Siamani e igoa ia Hans Robert Jauss. O lana “theory” e faamamafaina ai le tagata faitau i le fausiaina o le uiga o le tala.

O le mafauauga la, o loo i ai se faafitauli i totonu o le tala, ma e mana'omia le tali atu o le tagata faitau i lea faafitauli. O le mafuaaga lea ua faaigoaina ai le metotia o le “Reader Response.”

O le Reader Response o se fetai'iga o le tagata faitau ma le tala. E faia le tagata faitau i le tala, e faia foi le tala i le tagata faitau.

*(i) E iai eseese laiti i le faaupuga sa'o o le muagagana lea. Fai mai isi o le “To'ai faa-i'a a po” ae fai mai nisi o le “To'ai faa-i'a o le po.” A o le talitonuga lava, poo le a lava le faaupuga sa'o, e le o suia lava le uiga e pei ona iai se taumafaiga vaivai i lenei pepa.*

O totonu o le tala o loo iai ni faatonuga mo le tagata faitau, mo le faitauina o uiga. E peiseai ua faamoemoe lava le tala i le tagata faitau ina ia maua ai le uiga, aua e pei ona fai mai se tagata suesue iloga o le Reader Response, o Stanley Fish, o tala ua na ona taatia mai, ae leai sona aoga pe a aunoa ma le tagata faitau. O lona uiga, e taua le pitolaau a le tagata faitau, aua e le maua le uiga o le tala pe a le faitauina.

Ua faaaogaina e le isi tagata suesue iloga o le Reader Response o Wolfgang Iser le faaupuga o le ‘Implied Reader’ e faaigoaina ai le tagata faitau i le taimi nei. O le manatu o Iser, ua mamao lava tatou ma le taimi ma le nofoaga a le tusitala, e leai foi se tala faaopoopo o maua e ta'ua mai ai le igoa ma uiga o le tusitala. E le o tatou la o ‘actual readers’ na ola i lea vaiata. A o i tatou o ‘implied readers; poo e o loo iai le tiute e faauigaina le tala, e ala i faatonuga ua aumai i totonu o tala. E moni lea manatu pe a fua i le Tusi Paia ua sili atu ma le luaafe tausaga talu ona tusi. E le o toe mafai ona fesoota'i i tatou ma le tusitala ina ia iloa ai le uiga o le tala. O le mamafa la o le faauigaina o le tala, e pa'u lea i le tagata faitau o le taimi nei poo le ‘implied reader.’

Mo se isi faamatalaga, ua faaaogaina e Iser le ata faata'ita'i o fetu. Ua faatusaina le tala (text), i se tuufaatasiga o ni fetu (constellation). O le mau a Iser, e le tutusa le vaai a ni tagata se toalua, i lea lava tuufaatasiga. O le isi, a vaai i lea tuufaatasiga, ua ia iloa atu se palau moavao, a o le isi, ua ia iloa atu se manu lele. O le uiga o le faamatalaga, e tasi le tala ae eseese vaaiga i le tala lava lea e tasi.

O lona uiga e manaomia le feusua'i (fusion) o le itulagi o le tagata faitau, ma le itulagi o le tala, ina ia faaaoga le itulagi o le tagata faitau, e tali fesili o loo aumai i le tala. O ina o le a maua ai le uiga o le tala, ma faatumu ai nisi o vaega o le tala o loo le mautonu ai manatu ma fesiligia le uiga. E ta'ua ia vaega o pupu (gaps)oi le tala.

### **3. Ta'iala Faitau: “To'ai Faa-I'a a Po”**

#### 3.1: Uiga o le Muagagana

O le muagagana e mafua mai i faiga faiva i le sami. E faapitoa le muagagana i le taimi o loo lama ai le faiva i le po, ae faate'ia i se i'a. O le i'a lea, a le o se malie, poo se isi fo'i i'a tele. O le agaga ma le uiga o lea muagagana, e faatatau i le faafuase'ia o se aiga, i le taunuu atu o ni malo sa le valaauina.

#### 3.2: Faaaogaina o le Muagagana e faavae ai le faatatau.

E fia avea le muagagana ‘To'ai faa-i'a a po’ e fai ma ta'iala faitau, ina ia faapupula ai nisi o manatu i le tala i le Esoto 12. O le faamoemoe lava o le faitauga, o le fia feusua'i o itulagi (horizon) o le tala i le Esoto, ma le itulagi o le tagata Samoa o loo faitauina le tala ina ia maua mai ai se isi uiga o le tala.

O le mea muamua e fia faamanino, e ese le vaaiga (perspective), ese le auala e faitau ai le tala (method).

#### **1. Vaaiga**

O le a se ituaiga vaaiga e maua mai le muagagana lenei? O le muagagana, o loo faatatau i le faafuase'ia poo le faate'ia o le tagata, i le oo mai o se tagata asiiasi

*faaaauu itulau e 5*

# O LE LAUGA

**Tusi Faitau:** Mataio 5: 43-48

**Matua:** Mataio 5: 44: “... ia outou alolofa atu i e ua ita mai ia te outou, ia outou tatalo foi mo e ua faasaua mai ia te outou.”

**Manatu Autu:** O le uiga o le Alofa Faa-Kerisiano

E le taumateina lava, le uiga ese o talitonuga na talaina e soo o Keriso, i le uluai senituri o le Ekalesia Kerisiano. E le taumateina lava le talanoa ai o tagata, i ia uiga fou, i ia faiga fou, ua laugaina e le ‘au soo ma uluai Kerisiano. E le tioa foi taumulimuli tagata ia Iesu a o le’i maliu. Taumulimuli foi i le ausoo a o le’i faasatauroina foi latou. Taumulimuli e fia faalogologo i nei tu ma faiga fou ua faasalalau e nei tagata. Ua talanoa ai tagata, ua salalau tala, se fai mai le tagata, a po mai lou alafau, tuu iai le isi alafau. A ita mai lou tuaoi, alofa iai ma ave iai se meaai. A fasioti mai, faamagalo iai ae ‘aua e te tau ma sui. Tatou o! Tatou o tatou te faalogologo ma tatou matamata. Ma tatou aai ai foi, aua fai mai e fai mea ofo le tagata lea e igoa ia Iesu. Fai mai na ia fafagaina le motu o tagata e lima afe i areto e lima ma i’a e lua. A o le tagata o le kamuta. O le tagata e le kea i le lotu Iutaia, aua fai mai tala na talanoa ma le fafine Samaria i le vaieli i le mutinitini o le la, o se mea e le talia i tu a le nuu ma le lotu.

O le a’oa’o Iutaia o Montefiore, ua ia ta’ua le vaega leni o le tusi a Mataio na tatou faitauina, o le vaega aupito sili ona ta’uta’ua o le Lauga i Luga o le Mauga, ma o le ogatotonu foi lea, o le Lauga i Luga o le Mauga. Ma e moni lava e leai se isi vaega o le Feagaiga Fou o loo putuputu ai le faamatalaina

fefo’ifo’ia’i o le vatapuia, ma le va o aga fesoota’i moomia, e pei o le vaega leni. Mo le tagata a lautele, o le vaega leni o loo faamatalaina mai ai le talitonuga faa-Kerisiano i lona faatinoga atoatoa. Ma e oo lava i se tagata e le’i ulu atu i se faitoto’a o se falesana te iloa o Iesu e ona upu ia, ma o ia foi na ia faitioina nisi o le ‘au mulimuli ia te ia, i lo latou le faataunuaina, o mana’oga o leni fetalaiga.

A tatou susesueina le fetalaiga leni a Iesu, e tatau lava ona muamua ona tatou susesueina pe o le a tonu lona uiga, pe o le a foi le mea o loo ia finagalo iai mai ia i latou o mulimuli ia te ia. Afai o le a tatou taumafai tatou te ola i mea ia o fetalai ai le Alii, e tatau lava ona tatou matua malamalama lelei pe o le a tonu le uiga o mea o ia faatonu mai e tatau ona tatou faia. O le a tonu le uiga o lana fetalaiga, ia tatou alolofa i o tatou fili? Love our enemies? E mafai ona tatou faia? E mafai ona sui a tatou amio? E mafai ona fasioti e le la aiga, se isi o lo tatou aiga, ae aua le tau ma sui ae faamagalo iai?

O le gagana Eleni e ‘oa tele i upu tai uiga tutusa, poo synonyms i le gagana Peretania. E pei o le upu alofa, e fa upu tai uiga tutusa ma faaaogaina soo mo le upu alofa. O ia upu e faamatalaina ai le alofa faale-aiga, poo le alofa i totonu o le lotoifale o le aiga. Pei o le alofa o le tama i lona atalii, poo le atalii i lona tama, poo le alofa foi i isi tagata o le aiga.

O le upu Eleni eros, o le nauna, ma lona veape eran, o ia upu ua faamatalaina ai le alofa o le alii i se tama’ita’i. E faamatalaina, o le alofa momoo, poo le alofa faananau. Poo le alofa faufautane. O nei upu uma i le gagana Eleni, o upu lelei uma, o loo faamatalaina

mai ai le uiga faale-tagata o le alofa. O le alofa o le tama i le teine. Poo le alofa o le tane i lana ava. Peitai, ina ua mavae atu isi auga tupulaga ae oo mai isi auga tupulaga, ua amata ai foi ona filogia uiga o ia upu, ma ua pispisia i ni uiga le mama. Ma ua faasolo atu ina filogia le alofa, eros, i le uiga, tu’inanau, lust. Pei ona tupu nei i Samoa ma le lalolagi, o le faaoo o sauaga mataga e le tama i lona lava afafine.

O loo iai foi le upu, philia i le gagana Eleni. O le upu aupito mafanafana lea ma le lelei mai le gagana Eleni, mo le upu alofa - love. E faamatalaina e lea upu le alofa moni, ma le mama. O le isi uiga o lea upu o le feasogi. O le upu mo le alofa matua mafana, poo le alofa aupito sili ona lelei ma tausaaafia. E pei ona amio a’i ulua’i Kerisiano, pe a tuua a latou sauniga. O le aga lea, poo le tu lea, na faaaogaina sese e Iuta le Sekara, ina ua sosi atu ia Iesu i le po na ia faalataina ai o ia. Ua liliu e Iuta le mea lelei, e fai ma mea leaga. Le alafau i le alafau, ua fai ma mea leaga.

E iai foi le alofa e ta’u o le agape, ma lona veape, agapan. Ou te faa-Samoaina le upu Agape oi le gagana Eleni, o le agalelei le mataofiofia, pe le mafaato’ilaloina. A tatou manatu i se tagata o loo ia te ia le alofa agape, o lona uiga tusa lava pe o le a le mea e fai e lea tagata ia tatou, pe faapefea ni ona uiga mai ia tatou, pe upuvale mai ia tatou, pe faamanu’alia tatou ma tatou faanoanoa ai, o le a le mafai lava ona tatou tuuina atu se avanoa e oo mai ai se loto tiga ia tatou, ae tatou te faaalua le agalelei le mafaato’ilaloina, tatou te le sailia ai seisi lava mea, pei o le tau ma sui, ae tatou te tatalo, ina ia maua e lea tagata, le manuia, o loo tatou sailia foi, mo tatou. Alofa faaphilia, alofa faa-agape, alofa

*faaauau itulau e 4*

# O LE LAUGA

## *mai le itulau e 3*

faafeasogi, e pei ona faia e ulua'i Kerisiano i uluai senituri o le Tala Lelei ia Iesu Keriso. O le alofa lea o loo faaalua pea lava pea e o tatou uso a Kerisiano i atunuu Moselemu o loo sauaina ai i latou i nei ona po. Tiga ona fasioti mai; tiga ona taufaamata'u mai; tiga ona sasa mai ma faasufi mai ina ia faifai ia Iesu Keriso, ae liliu atu ia Allah lo latou Atua; ae tutumau pea le lotu tetele o Kerisiano, sei oo lava i le oti.

E le o le finagalo o Iesu ina ia tatou alolofa atu i o tatou fili e pei ona tatou alolofa i e pele ia i tatou, e pei o a tatou fanau. E le mafai ona tatou fai o lea mea. Ma e le sa'o foi. O le a lona uiga moni?

O le alofa ia tatou fanau ma aiga, o se mea e fanau mai i o tatou lagona faaleaiga, ona o tagata na fananau mai o tatou tagata, e iai o tatou piitaga vavalalata. Ae o le alofa i o tatou fili poo e ita mai ia i tatou, e le gata o se lagona mai o tatou lotu, a o se mea tatou te mafaufau lelei iai, ma tatou manana'o e fai, ona o se mea e tatau, e tusa ai ma o tatou talitonuga faa-Kerisiano. Fai mai se isi tagata, o le agape, o le malosi lea tatou te alolofa ai ia i latou tatou te le fiafia iai, ma e le fiafia mai foi ia tatou, ma sauaina tatou. O lona uiga, tusa lava poo iai uiga ia i e tatou te tuaoi, tatou alolofa pea iai, ma faamagalo iai, ma tatou tatalo ina ia faamanuiaina foi latou e lo tatou Atua. O le tausiga moni lava lea o le filemu, ma le fealofani, i le va o tagata, ma aiga, ma tuaoi.

O le mea moni lava, faato'a tatou maua le alofa ua faamatalaina e upu Eleni e lua o le agape, ma le philia, pe a iai Iesu i o tatou lotu, e mafai ai ona tatou faatoilaloina o tatou lagona faale-tagata, o le

manatu faapito, o le ita, o le matau'a, o le lotu tiga, o le inoino, ma le fia tau ma sui. A afio Iesu i totonu o o tatou lotu, ona mafai lea ona tatou alolofa i le alofa ua fetalai mai ai Iesu i lana tali i se tasi o le au faresaio lea na fesili poo le fea tulafono e sili, ae tali Iesu, "*E te alofa atu i le Alii lou Atua ma lou lotu atoa, ma lou agaga atoa, ma lou manatu atoa.* O le poloaiga muamua lena ma le sili. E faapena foi lona lua, *E te alofa atu i le lua te tuaoi, ia pei o oe lava ia te oe.* O le tulafono lea i ona vaega e lua ua faamatalaina e nisi, o le tulafono auro o le alofa.

Alofa faa-agape, alofa faa-phia e pei ona faamatalaina i le gagana Eleni. Ae ui lava i lea, tusa lava pe o se a so tatou alofa ua faia mo lo tatou Atua, ma se alofa ua tatou

faia mo e tatou te tuaoi, e le taitai, le taitai lava, ona ausia le alofa ua faia e le Atua mo tatou, e pei ona tautala iai le Evagelia a Ioane mataupu e tolu fuaiupu e 16: "Aua ua faapea lava ona alofa mai o le Atua i le lalolagi, ua ia aumai ai lona atalii e toatasi, ina ia le fano se tasi e faatuatua ia te ia, a ia maua e ia le ola e faavavau." O le alofa na auina mai ai le Alo o le Atua, e oti, ina ia tatou ola.

O fetalaiiga ma a'oa'oga a Iesu, o fetalaiiga ma a'oa'oga ina ia tatou ola manuia, ma tatou maua le ola e faavavau.

Le auuso e i lenei taeao, fai mai le tatou matua: "...ia outou alolofa atu, i e ua ita mai ia te outou, ia outou tatalo foi, mo e ua faasaua mai ia te outou..." O le finagalo lea o lo tatou Alii Faaola, tatou te manuia ai. Amene.

Afemata T. Apelu Aiavao

Faatonu O le Sulu Samoa

(e sui ai le lauga na faatulagaina e le'i taunuu mai)

---

## O le Atua na To'ai Faa-l'a a Po

### O se Faitauga o le Esoto 12:12-13

#### *mai le itulau e 2*

poo se malo foi, sa le'i mafaufauina pe le'i valaauina. E ono maua la ni lagona o le fefe, popole, poo le fiafia foi. A silasila i le faata'ita'iga o le faate'ia o le fai faiva i le po e se i'a tele, e lua vaega taua:

i. E mafai ona faapea o le i'a o le poo o se **faamata'u (threat)** pe afai o le a aafia ai le ola, i le i'a.

ii. E mafai foi ona faapea o le i'a o le po o se **avanoa (opportunity)**, pe afai o le i'a o le a ola ai, ina ua fagotaina.

E aveva la manatu ia e lua, e ta'iala ai manatu pe a faitau le tala. O le a faalauaitetele i se taimi mulimuli. Ae fia fai se faamatalaga i le auala e faitau ai le tala (method).

**2. Auala e faitau ai le tala (Method of Reading).** O le auala e faitau ai, e le tutusa ma le vaauga. O i o le a faamatala atu ai le faatinoga o le faitau, ma faafesootai ma le Reader Reponse. A tuu i se isi faaupuga, o le vaega lea o le pepa, o se faa-Samoaina o le Reader Response. O lea o le a faaoga lava upu o le muagagana e faafesoota'i ma le faiga o le faitau.

#### **i. To'ai**

O le a faaoga le upu 'to'ai' e

---

*O le atalii poto na te faafiafia lona tama, a o le tama valea e faanoanoa ai lona tina.*

# O le Atua na To'ai Faa-I'a a Po

## O se Faitauga o le Esoto 12:12-13

*mai le itulau e 4*

faamatala ai le fetai'a iga o le tagata faitau ma le tala. O le upu to'ai' e uiga tutusa ma le 'taunuu'. Ua to'ai/taunuu le tagata faitau i le itulagi o le tala, ae o loo to'ai foi le tala i le itulagi o le tagata faitau. O le avanoa lea e feusua'i ai itulagi, ina ia maua ai se uiga fou. O le to'ai la, o le feusua'iga o itulagi (fusion o horizons).

### ii. Faa-I'a a Po (Like a fish at night)

O le mea e fia faamamafa i lea faaupuga, o le te'i. O le te'i o le fai faiva ona o le i'a o le po. E faapena foi la le tagata faitau, e te'i ona o vaega o le tala e le o manino, poo vaega foi o le tala ua le mautonu ai se lagona. E iai foi taimi e ma'ale'ale ai lagona ona o se vaaiga matuia oi le tala, ma e lagona ai foi le te'i o le tagata faitau. O nei manatu laualuga, o le **te'i** e le o se mea e taofia ai fua le faitau. A te'i, e le o le sola ese, ae o le faafetaia'i loa. O le faamoemoe la o le 'faa-i'a a po' e le o le 'alo ese mai vaega ma'ale'ale i le faitau, ae o le faafeto'ai loa o le tagata faitau ma le tala, mai se isi vaaiga, ina ia maua ai se isi uiga o le tala.

### iii. O le moana

E le o ta'ua le moana i le muagagana, ae ua manino lava o loo iai le moana ona o le mea na mafua mai ai le muagagana. Ae ua ala ona aumai le moana, ona o le moana o le faatusa lea o le tala. A silasila i le moana, e lanu moana ma to'afilemu pe a vaa'i mamao mai le matafaga. Ae o lalo o le fogasami, o loo iai le vevesi i le tele o i'a ma figota o le moana. E le iloa atu mai luga atu o le moana, se'iloa e mauu i lalo, ona iloa lea

o le tele o figota o loo iai.

A faauiga i le tala, o le fogasami, o le faatusa lea o vaega o loo faigofie ona iloa atu i le faitau. A o lalo o le fogasami, o le faatusa lea o vaega o le tala o loo taotaomia ma e manaomia le fagota mai luga. Aua a le 'maulu' le tagata faitau ma 'fagota' mai vaega ma leo taotaomia o i le tala, e le mafai ona ia iloa le tele o uiga eseese e mafai ona maua mai ai.

4. O se faitauga "Faa-I'a a Po" o le Esoto 12:12-13

#### 4.1 To'ai muamua: Avanoa (Opportunity)

Fai mai le fuaiupu e 13:

*"E fai foi le toto ma faailoga ia te outou i fale tou te iai, ou te vaai atu foi i le toto, ona ou sosopo ai lea ia te outou; e le oo foi ia te outou le mala e fano ai, pe a ou taia le nuu o Aikupito."*

O le fesili faatupu manatu: E faapefea se vaaiga i le **sosopo** o le Atua ia Aikupito? Se'i toe aumai le faata'ita'iga o le moana, o le fogasami ma lalo o le moana. O le fogasami o le fuaiupu e 13, o Isaraelu: o fale o loo iai le faailoga o le toto. O lalo o le fogasami, o tagata lautele o Aikupito: o e e le o iai le faailoga o le toto. O i o loo iai le **te'i**, aua peiseai o loo faama'ite e le toto, le sosopo o le Atua.

E ese foi le malie o lea fuaiupu, pe a taga'i i le upu *pasah* lea e faaliliuina i le 'sosopo'. Aua o le isi uiga o le pasah o le oso (leap). O lona malie foi lea, peiseai na silasila loa le Atua i le toto, oso loa, pei o le oso o le tagata ua te'i. Aisea? Pe na oso ona ua inoino i le toto? E taua le silasila i le taua o le toto i le Feagaiga Tuai e faapupula atili ai lea tulaga.

O le toto i le Feagaiga Tuai, e fesoota'i ma uiga o le 'togisala' ma le 'puipui.'

#### i. Togisala (Atonement)

Fai mai le alii suesue i le Tusi Paia Eperu o Jay Sklar, o le faiga o taulaga mo le faamagaloina o agasala, e moomia le toto e totogi ai le sala, ina ia faamamaina ma faapaiaina ai le tagata na sala.

#### ii. Puipui

O le toto foi, e iai lona uiga o le 'puipui'. I le Feagaiga Tuai o le toto e mafai ona puipui ma lavea'i le tagata mai ni mala poo ni agaga leaga.

#### 4.2 To'ai lonalua: Faamata'u

(Threat) - O leo ua faatuatua'ni (neglected voices). . O lalo o le fogasami o le tala: o tagata leigoa (nameless) - ma manu foi - o loo faatuatua'ni i le faitau. E moni lava ua le tonu le pule a Farao, ma ua ia agaleaga i le nuu o Isaraelu, ae a toe silasila lelei i le tala, e le na o Farao na aafia i le mala lona sefulu. Na aofia ai ma tagata ua leai ni agasala, e oo lava i ulumatua o loo aumau i falepuipui, atoa ma manu. (Esoto 12:29). Na aofia ai ma pepe ma tamaiti, o tina ma tama'ita'i, o auauna tane ma auauna fafine, e oo lava i manu. O leo ia o loo taotaomia i le tala, ae ua le lavea'iina mai le mala.

#### 5. O se faatupu manatu: "O le Atua na to'ai faa-i'a a po i le Esoto: the interfering God in Exodus."

O le tasi lea o natura masani o le Atua i le Feagaiga Tuai, o le 'sopo'. I totonu o le tusi o Esoto, e le faama'itea lava e se isi le Atua, e sopo lava ia e tusa ma lona lava finagalo tutasi. O lona uiga, o loo atagia ai lona silisili ese ma lana pule aoao. Ma e fesoota'i lava ma le molimau a le tusi o Esoto e uiga i le Atua, e pei ona iai lona suafa o "El Shaddai" - (God Almighty). Ole Atua e ona le *faaauau itulau e 10*

*John Knox - 1514-1572*

# IOANE NOKISE

## “O Le na Ta’ita’i ma le Pelu”

Le Atua e, aumai mo a’u Sikotilani,  
a leai e sili ona ou oti!

### Toe Fo’i i Sikotilani

I Sikotilani, ua manino mai lava o le a onosa’ia faiga faa-Porotesano i lea vai taimi. Ma na faaaogaina e tagata Porotesano ia vai taimi e galulue ai, talai le Tala Lelei i soo se mea e maua ai le avanoa. Sa maualuga lava foi lo latou faamoemoe, e oo lava foi ia Maria le tina o le tupu teineitiiti, o le sa na ia vaايا galuega a le tupu e le’i matua, na iai lo latou faamoemoe, i le liliu mai o Maria i talitonuga faa-Porotesano. O lana tama teine laitiiti, o Maria foi le igoa, o loo a’oga i lea vai taimi i Farani, ma e iai se taimi o lumana’i e fo’i atu ai i Sikotilani ma avea ma tupu.

O Maria le tina, na ia filifilia se tagata Porotesano e fai ma sui o Sikotilani i Farani, ma lona faamoemoe e matala ai faitoto’a o fefaataua’iga i le va o atunuu e lua. Ua faasolo lava ina maua i ma’i o tagata matutua, ma o ona uiga ma ana mea e fai, e foliga mai ai ua amata vaivai lona lagolagoina o faiga faa-Katoliko, pe a faatusatusa atu lea ia Bloody Mary i Egelani. E toatele tagata Porotesano sulufa’i ua sosola mai Egelani i Sikotilani, ma lo latou talitonuga e saogalemu ai. Ae matua mana’omia lava e latou ni faifeau ma ni failauga o le Tala Lelei.

O le taimi lea o loo tau faamaopoopo ai e Nokise se aulotu o tagata Egelani i Sineva. O loo ia a’oa’oina ma faatonutonu ia tagata mo se taimi e oo ai ina toe foi latou i Egelani, ma latou faoa

le pule mo Porotesano.

A o lea vai taimi atoa o loo ia maua mai pea ni tusi mai ia Mrs Bowes, o ta’u mai ai le malosi o le u’una’i o lona aiga ina ia auai i Misasa. O le le lagolagoina e lona aiga o faiga faa-Katoliko ua avea ma mea e lamatia ai lana tane, e ui lava o loo lauiloa lava e musu lana tane e liliu mai mai le lotu Katoliko. Na oo lava ina matuu le lotu o le toalua o Mrs Bowes ina ia tuua loa e la’ua ma lana tama o Marjory ia Egelani. O le manao o Mrs Bowes, ia faatasi atu ma lana tama o Marjory ia Nokise i Sineva ina ia mafai ai ona latou tapua’i faatasi i mea latou te talitonu latou iai.

E le’i muta le tusitusi atu pea o Mrs Bowes ia Nokise. Seia oo lava ina tapena e Nokise le malaga atu o Mrs Bowes ma Marjory latou te feiloai i Sikotilani.

Na faanoanoa lava Nokise i lona tuua o Sineva ae toe foi i Sikotilani. Ae na oo ina fiafia ina ua mae’a sana laugaga faasolosolo i Sikotilani ona o le fiafia o le tali ane o tagata. Fai mai a ia o Mrs Bowes na faalototeleina ia e alu atu i Sikotilani.

### Ua Faaipoipo Nokise ma Marjory

E toatele tagata e fesoota’i pea lava pea ma Mrs Bowes ma Marjory i Berwick, na faigofie ai ona taunuu atu i le atunuu ma le le iloa e le toatele o tagata. Na taunuu atu loa Nokise i Etiniporo i le faaiuiuga o le tau mafanafana i le tausaga e 1555, ona faaipoipo ai

loa lea ma Marjory.

O lea la ua le gata ina fai se faletua o Nokise, a ua iai foi ma sona ‘mother in law’ - poo le tina o lana ava, latou te nonofo. E le tele lava ni faamaumauga tusitusia e uiga ia Marjory, vagana ai le mea lea, e 18 ona tausaga ae faaipoipo ma Nokise, a ua 38 tausaga o Nokise i le taimi lea. E to’amalie ona uiga ma mata fiafia, ma e foliga mai lava e manuia lo la aiga fou, ma faamaonia ai o Nokise ma Mrs Bowes e sese tala fe’avea’i e matagi i ni o la uiga lililo sa masalosalo iai nisi. Na maua mai e Nokise mai ia Marjory ni atalii se toalua, o le ulumatua o Natanielu, na fanau i le 1557. Sa fai foi e Marjory galuega faafailautusi mo le galuega faamisiona a lona toalua o Nokise.

### O le Alaga Malosi i Sikotilani

Na faamalosi’au ia Nokise le gasolosolo pea i luma o faiga faa-Porotesano i Sikotilani. Ua iai nei aulotu i Etiniporo, St. Andrew’s, Dundee, Perth ma isi aai tetele e matua taua lava i le atunuu. Ua uuna’ia e tagata Porotesano ia Nokise ina ia nofo pea faatasi ma latou e fai ai o ia ma malosiaga mo latou. Na talia e Nokise.

O masina e iva na sosoo ai, na faasolo ai laugaga a Nokise i mea sa valaaulia mai ai o ia, ma nisi foi vaega o le atunuu na ia filifilia, ma fai ai ana lauga malolosi i soo se mea e lauga ai. Na matua ofo lava tagata na auai i ana lauga.

Sa masani lava ona amata ana lauga i le tau faamalalamaina lea o le mataupu o le a ia lauga ai, ona ia faaaoga loa lea i mea o tutupu i le atunuu ma le ola o tagata i aso uma, ma faaaoga ona lima i ana taga ma tapo le pulelaa.

Fai mai se tagata na iai i le faapotopotoga i se isi aso, “E pei e mafui’e o’u tino ma le mafai ai ona ‘u’u la’u peni.” O Nokise o se tagata na matua aoga mo taumafaiga faa-Porotesano.

*faaauau itulau e 7*

# O Maturo i le Tala Faasolopito Dietrich Bonhoeffer (Ponehofa)

Siamani - 1906 - 1945

O le aso 9 o Aperila 1945, na o ni nai aso e le atoa se vaiaso, ae taunuu fitafita a Peretania ma Amerika ma isi malo na latou au ma faasa'oloto le nofoaga o le oti (death camp) o Flossenipeka (Flossenburg) i Siamani. O le taimi lea faato'a mae'a lava ona sisiina e fitafita Siamani a Hitila le alii faifeau o le lotu Luteru, o Titeriti Ponehofa. O Titeriti Ponehofa sa matua tetee ia Hitila ma lana faigamalo i le vaitaimi o le 1930-1940.

A o talavou Titeriti, o ia o se tama a'oga poto, mai se aiga e tulelei ma lima malosi. Ina ua i'u mai o ia mai le Iunivesite o Perelini, ona toe ulufale lea i se a'oga o le Tusi Paia i Niu Ioka. I le nofoaga e maua iai tupulaga amio pa'a ma

le le taupulea, o Harlem, na faia'oga ai i le A'oga Aso Sa, ma faia'oga foi i mataupu o le Tusi Paia. O lea nofoaga na ia malamalama ai i le mea o le faailoga lanu. Ina ua atoa lona 25 tausaga, ona faia'oga ai lea i le Iunivesite o Perelini i mataupu tau le Tusi Paia.

Ina ua tula'i mai Hitila e fai ma ta'ita'i o Siamani i le 1933, na alia'e mai ai Titeriti o se soupu tau i le Confessing Church, o le nofoaga tutotonu o faiga faa-porotesano e tetee atu ai ia Hitila ma lana pulega faa-Nazis.

O le tau e totogo a'e ai mea i lea tausaga na faia ai e Hitila ni tulafono e tetee ai i tagata Iutaia. O tulafono ia na matua sauaina ai tagata Iutaia, ma fasiotia ai le tusa

o le ono miliona tagata Iutaia i le taimi o le Taua Tele Lonalua a le Lalolagi. Na faaalai ai i lea taimi e Ponehofa i sana lauga e faapea, o le Ekalesia e tatau ona tetee atu i le malo pe a ia faia ni i'uga e le tusa ma le Afioga a le Atua. Fai mai a ia, afai e aveina e se 'avetaavale e le faautauta se taavale ma manunu'a ai tagata, o le mea e tatau ona fai, e le gata ina fesoasoani i le 'au manunu'a, ae ia taumafai foi e taofi le taavale. O le vai taimi lea ua faatuputupuina lava le toatele o Kerisiano e lagolagoina ia pulega fou a Hitila, ma e toatele sa iai i le falesa i le taimi o le lauga a Ponehofa. Toetoe lava solo tetee uma i fafo le vaega lea e faaali ai lo latou le fiafia i le lauga.

Mulimuli ane, ina ua palota le Ekalesia Porotesano i Siamani ma latou lagolagoina faiga faa-Nazi a Hitila ma lana faigamalo, ona fesoasoani lea o Ponehofa e amata  
*faaauau itula e 16*

John Knox - 1514-1572

## IOANE NOKISE

“O Le na Ta'ita'i ma le Pelu”

Le Atuae, aumai mo a'u Sikotilani,

Na matua fefefe epikopo Sikotilani ona o le lauiloa o Nokise ma ana lauga, o le mea lea, i le tausaga e 1556, na amia ai o ia ina ia alu atu i Etiniporo e tali i ona moliaga faale-tulafono. Ae le'i talia e le 'au Porotesano lea amiga. E fia selau tagata na solo tetee e lagolago Nokise. Ina ua faalogo iai le tina o le tupu tamaitiiti, i solo tetee ua taupulepuleina, ona ia fai ai lea o se faatonuga e taofia ai ia solo. Ae na fai lea taofiga ma mea ua faamalosi ai loto o tagata Porotesano, ma taumafai ai ina ia liliu atu le loto o Maria, le tina o le tupu teineitiiti, i talitonuga faa-Porotesano. Ma latou talosagaina ai Nokise na te tusi se tusi ia Maria le tina o le tupu teineitiiti, se'i ona tuu mai se avanoa e faalogologo

ai i le laugaina o le Upu a le Atua. Na malie iai Nokise. Ae na fai faafia le tusi ma tasui, toe tusi ma tasui, seia oo lava ina ia tuua'ia le malo, ma fai iai a le suia ona uiga, e matua mafatia lava se'ia oo i le faavavau.

Ona ave lea iai i le tina o le tupu le tusi. Ina ua uma ona ia faitau iai, na te le'i amana'ia mea o iai, a ua ia tuu ane i le epikopo i Glasgow ma fai iai, “Faitau i le tala faafagogo lea.”

Na manatu le fafine o le tusi a Nokise o se mea taufaa'ata. Na avea le tusi a Nokise ma mea na atili ita ai le fafine ia Nokise ma tagata Porotesano.

Ae o loo lafo ane pea tusi mai Sineva mo Nokise, ma faatonuina ai o ia ina ia fo'i atu i Sineva e tausi

le lafu mamoe Egelani o loo iai. Ona manatu ai lea o Nokise, e le'i oo i le taimi e seleselina ai taumafaiga i Sikotilani. Ona foi ai lea o ia i Suiselani ia Iulai 1556.

E taunuu atu Nokise i Sikotilani, ae taunuu foi ma le tusi samania mai Sikotilani, na faatonuina ai o ia e foi atu i Etiniporo e tali i ona moliaga faale-tulafono. E le'i alu iai Nokise. Ona fausia ai lea e tagata Katoliko se laau ma vali ai i luga se ata o Nokise, ona latou susunuina lea i se magaala.

Na matua ita Nokise ina ua faalogo i lenei mea. A o le mea na ofo ai, e le'i tali iai i ia faiga. A ua ia nofo ai pea i Sineva mo nisi tausaga se lua, ma tau taofiofi ai lona ita. A ua ia le faagaloina foi o Maria le tina o le tupu teineitiiti o ia lea o loo ta'ita'i i ia faiga ma fai ni ona tuuaiga e sala ai i le oti. Mai lea taimi, na talitonu ai Nokise o Maria le tina o le tupu o se fafine pi'opi'o ma le fasioti tagata.

# ITULAU MO TUPULAGA TALAVOU

## Tumutumu Mauga Amerika (Summit America)

**Mai i lou Faatuatua i le Atua, ma lou Talitonu i Taleni ua e maua mai le Atua, e mafai ai ona e A'ea soo se Lu'itau lua te Fetaia'i i le Olaga**

### *mai le itulau muamua*

o Toti; o loo malamalama pea e le'i matapogia mai le anoano ma le tuga o nisi o ona manu'a. Sa faavavevave atu le vaaafi i le matafaga e le tama o Toti ma isi ona atalii e toalua ma ni uo se toatolu.

E uiga ese le mea ua tupu. O lea faato'a uma le aso matua fialava, o faaseega i laupapa i se vaituloto i Oklahoma, o le mea lea o loo nonofo ai matua o ona matua. Ae na mana'o Toti e toe alu e toe faasee tasi ona o le manaia o le aso ma le tele o le fialava.

A o talatala e Toti maea e faa'oga i faaseega, na oo ina lavelavea se maea i le kia o se isi o a'fi o le vaaafi, ma see ai i le solomuli le kia. Na lavelavea le maea i le a'fi, ma tosoina atu ai vae o Toti ma vilia ai i tapili o le a'fi o loo ola. Na laulogo le mea i le 'e'e a Toti, a ua leai se mea e mafai. O lenei ua oo i le falemai, ma iloa ai le tulua le mai ma le magalo i le ola o Toti. Ua motusi isi o uaua ma neura o le vae taumatau, ma ua pe ai mai le tuli e oo i tamatama'iva'e, ma ua le toe aoga le vae, ua pe atoa. Fai mai foma'i e ono le toe mafai ona savali Toti.

Na faasolosolo ina toe malosi Toti mai ona manu'aga, peitai na oo ina maua le vae taumatau i nisi ma'i ona o ona manu'aga. O le isi fitu tausaga na sosoo ai, na tauivi ai lava Toti, i lona mafaufau ma lona malosi sa iai, ina ia toe lelei lona vae lea e leaga tele. Ae o lea ua oo nei i le taimi e faafeagai ai o ia ma le popole, ma le fefe anoanoa'i.

O se aso o le masina o Aperila 1981, na ta'oto ai Toti i luga o le moega tipitipi ma faatalitali mo lona ta'otoga. Sa talatalanoa ane ma le loto tele i le aufaigaluega a le falema'i, ma ia ta'ua le ituaiga pizza e fia 'ai ai pe a ala mai lona ta'otoga. "Ou te fia 'ai i se pizza mai Kanata o fasipuaa ma fala," o lana 'ata'ata ane lea. Ua latalata lava le ta'otoga, ae oo ane foi le to'afilemu ia Toti. Ua tumu lona loto i le filemu ma le le popole. Sa ia manatua foi le tele o fuaiupu mai le Tusi Paia sa ia taulotoina a o tamaitiiti. Sa tau manatua e ia le isi fuaiupu e faapea, 'O le amiotonu e muamua atu i ona luma ma teuteu lona ala.'

Na mautinoa lava e Toti o le isi laasaga mo ia o le tipieseina lea o lona vae taumatau. Ua te'a

nisi ona masalosologa i le mea e tatau ona fai, a ua oo mai ia ia le loto tele. O ona faamoemoega mo le ituaiga olaga mo ia i le lumana'i, ua te'a atu ma o le a le oo.

E le'i umi lava, ae mae'a ona aveese lona vae atoa. Peitai, ua tatala mai nei le faitotoa mo isi mea e mafai ona ia fai.

Ua a'oga i le mataupu o le saikolosi e pei ona fautuaina ane e nisi o ana uo ma lona aiga. Ma e na i'u ma ni ona faailoga e lauiloa ai ona tomai i lea mataupu. Na ave'a ma faatonu o le Ofisa mo Tagata ua leai ni Vae, i Kalefonia i Saute. Na ave'a lona tomai i le mataupu tau saikolosi, ma lona malamalama lelei i aafiaga o le tagata ua mutu sona vae, na ia matauina ai le faigofie ona ia fesoasoani ma faalototele i isi tagata vaemumutu. Ae o a nisi laasaga o tutu mai luma mo ia? O lana fesili lea ia te ia lava.

A o le'i tupu le faalavelave na oo ina mutu ai lona vae, sa to'aga i le savali, ma tolauapi ma isi tama ma teine i vaomatua faasaoina, fai ana uo teine, tafafao foi ma ana uo tama ma auai i taaloga e fai. Ae ina ua lavea i tapili o le vaaafi ma mutu ai lona vae, na faaauu pea ona fai o ana uo teine, ma ana uo tama, ma auai ia latou familia'iga ma tafaoga. Ae ua faigata ona toe taalo i se taaloga sa ia masani ai.

O le vae faapipii lea e mafai ai ona savali, toetoe lava e na o le savali le mea e aoga iai.

E iai po e mafaufau ai o ia a o ta'oto i lona moega, pei lava o loo tamo'e i se malae, ma faalala ona lima pei ni 'apa'au, ma 'lele'. Ae te'i ane, o le la lava e ta'oto i lona moega. Ua  
*faaauu itulau e 9*



# ITULAU MO TUPULAGA TALAVOU

## Tumutumu Mauga Amerika (Summit Amerika)

**Mai i lou Faatuatua i le Atua, ma lou Talitonu i Taleni ua e maua mai le Atua, e mafai ai ona e A'ea soo se Lu'itau lua te Fetaia'i i le Olaga**

*mai le itulau e 8*  
toe fia tamo'e lava!

O le tausaga e 1993, na taunuu ai lona mana'o. E iai se ituaiga vae faapipii fou e ta'ua o le Flex-Foot, ua fausia e se tagata. Na vave lava ona maua sona vae faapipii Flex-Foot. Na faigata ona faaaogaina i le amataga, laa ma pa'u, laa ma pa'u. Selasela tetele. Ae taumafai lava, ma oo ina mafai ona ia tamo'eina maila e 12 i le aso.

O le taimi lea na tau ane ai se isi o ana uo i se faasalalauga i se nusipepa, o se faalapotopotoga o loo latou mana'omia se vaemutu e mafai ona ia a'ea tumutumu mauga aupito maualuluga i setete uma e 50 o Amerika. E to'afa isi vaemumutu ua iai, a o loo saili se isi e to'alima iai. O le matati'a, ia ausia tumutumu mauga uma e 50, i totonu o aso e 100 poo le itiiti ifo foi.

Ua tata tetele le fatu o Toti ina ua faitau i le faasalalauga lea. Fai mai Toti ia te ia lava, "Ia o le a le mea e le alu motu loa iai? Sa ou fiafia i le sopo solo i vaomatua o Amerika. O le avanoa lea e saili ai pe o fea e oo iai lo'u malosi ma lo'u mafai." Ona tusi talosaga loa

lea iai o Toti, ma ua talia.

O le taumafaiga e amata ia Aperila 1994. Tusa lea o le tausaga atoa e sauniuni ai Toti mo lea taumafaiga. Amata loa ona koloni Toti - 'a'e mauga; faamalosi tino; sui ana mea'ai; fai mai le toatele o tagata na latou iloa le taumafai o Toti, o se mea lelei lea mo ia. Ae iai foi isi e fesiligia le tatau o lea mea ua taumafai iai. Ae le'i faavaivaia Toti ia i latou sa faatautau.

Na mautinoa e Toti o se mea lelei lea mo ia. A fai ana tatalo i le Alii, na talitonu lava ia o le faasinoga lea mai le Alii mo ia.

Ua solosolo lelei lava mea uma. Peitai, o le masina o Fepuari 1944, na ia maua ai se faaaliga na ia faanoanoa ai. Ua le taunuu le faatupega o le faamoemoe.

Ae fai mai Toti, "Ou te le faavaivai ai. Ua tele ou taimi ua alu i a'u sauniuniga. E iai le fea'u o loo i lenei mea e tatau ona faalogologo lelei iai. A tusa ai lava ma le finagalo o le Atua, e iai lava se ala e mafai ai.

O vaiaso e ono na sosoo ai, na lava tupe na ia maua mai tagata sa lagolagoina lona taumafai, e faataunuu ai le a'ega

mauga. O Whit Rambach o le a la to'alua i le a'ega o mauga. O Lisa Manley o le a faatonutonuina le ofisa. Ua sauni mea uma; ua sauni foi Toti mo le a'ea o "Tumutumu Mauga Amerika!").

A o tapena le a'ega mauga, ae maua e Toti tala e faapea na o le to'a 31 tagata ua latou a'ea tumutumu mauga aupito maualuluga o Amerika. Ae toatele atu i latou ua latou a'ea le tumu o Evaresi, le mauga aupito maualuga o le lalolagi.

Na amata le taumafaiga a Toti ma Whit i le itula e 5:10 pm, i le aso 1 Iuni 1994 i le tumutumu mauga o Mt. McKinley i Alaska. O loo umia le matati'a e Adrian Crane, ae sa fesoasoani iai le satini o le ami o Mike Vining, ina ia a'ea le tumutumu o Denali, o le igoa Initia lea o le tumutumu mauga o Mt. McKinsley. E 12 aso o fetaia'i lava le taumafaiga ma le leaga o le tau, mama'i ona o le maualuga o le mauga. Na iloa lava e Toti a o le'i amata le taumafaiga, e anoanoa'i faafitauli mata'utia, ae faato'a ia talitonuina ina ua latou fetaia'i ma ni tagata o toso mai ni tino oti o ni tagata se to'alua.

O le afe futu mulimuli o le taumafaiga sa aupito sili ona faigata. Fai mai Toti sa ia mafaufau lava, faato'a talitonu tagata i se lesona mai lana taumafaiga, pe a ia a'ea tumutumu mauga. Ma o le mea lea sa u'una'ia ia i le tini.

Na fesoasoani ane foi se kamupani telefoni e faatupe le tau faai'ui'uga o le a'ega mauga. Ua avefa foi lea ma mea e salalau ai tala i le taumafaiga a Toti ma maua mai ai ma isi

*faaauau itulau e 10*

# ITULAU MO TUPULAGA TALAVOU

## Tumutumu Mauga Amerika (Summit America)

**Mai lou Faatuatua i le Atua, ma lou Talitonu i Taleni ua e maua mai le Atua, e mafai ai ona e A'ea soo se Lu'itau lua te Fetaia'i i le Olaga**

*mai le itulau e 9*

fesoasoani e faamae'a ai le taumafaiga. Aua ua avea le kamupani telefoni ma ala e salalau ai i nusipepa ma leitio tala o Toti ma lona taumafai.

Na solosolo lelei mea uma se'ia oo i le taimi e fe'a'ei ai i le tumutumu lona 47, o Mt. Hood i Oregon. Toe tasi le vaiaso amata ona fe'a'ei i le mauga lea, ae maliliu ai nisi se to'alua. Na fautuaina Toti e aua ne'i taumafai i le mauga lea.

Ua faaletonu nei Toti. Ona ia faafesoota'i lea o lana uo sa la a'o'oga, ma o se tagata a'e mauga o ia te ia le potu masani i lea mea, o lona igoa o Fred Zalokar. Na faalogo mai loa Fred i tala a Toti tali mai, "Toti, ua tele ou taimi ua alu i au tapenaga. Totogi mai lo'u pasese ona ou alu atu lea ta te to'alua ma oe i luga o le mauga - e aunoa ma se faalavelave."

Tele taimi na toe fai ai feutaga'iga ma e pulea le mauga. Fe'a'ei loa Toti, Whit ma Fred, se'ia oo ina latou a'ea le tumutumu o Mt. Hood. Totoe nei na o le tolu tumutumu oo i le tini ma le tumutumu mulimuli.

O le aso 7 Aokuso 1994, i le

itulau e 11.57am, na tu ai Toti i le tini, o le tumutumu mauga o Mauna Kea i Hawaii. Ua ia ausia le tini o le a'ea o tumutumu mauga e 50 i aso e 66, 21 itula ma minute 47. E 35 aso ua itiiti ai aso i lo aso na a'ea ai le matati'a o loo iai.

A o le isi mea e ofo ai, ona o le matati'a sa iai, sa faatuina e se tagata e lua ona vae. Ao Toti, na o le tasi lona vae na mafai ai ona fai o le taumafaiga.

Ua matua fiafia Toti, e le gata

ua ia faatuina se matati'a fou, a o lea ua ia maua le tali i le fesili na fai i le amataga ina ua lavea i le tapili o le vaaafi."Aisea ua tupu ai ia te a'u lenei mea?"

Ua 33 ona tausaga, ma ua ia mautinoa, o lona manumalo mai ona mafatiaga o le a avea ma lu'itau i isi tagata e mafai ai ona latou tali atu i o latou foi mafatiaga ma faafitauli o le olaga.

Ua valaaulia soo Toti mai le tele o faalapopotoga mo ni ana tautalaga, e faamalosi'au ai i isi tagata. Na te faamamafaina lava i ana tautalaga lona talitonuga: **"Mai i lou Faatuatua i le Atua, ma lou Talitonu i Taleni ua e maua mai le Atua, e mafai ai ona e a'ea soo se Lu'itau lua te Fetaia'i i le Olaga." ###**

tusia e **Lisa Manley**

mai le tusi:

**"Chicken Soup for the Soul"**

faamatalaina e

Afemata T. Apelu Aiavao

## O le Atua na To'ai Faa-l'a a Po O se Faitauga o le Esoto 12:12-13

*mai le itulau e 5*

malosi uma lava.. (silasila i le Esoto 6:3) E tusa ai ma manatu o le 'au suesue, o loo aumaia e le suafa "El Shaddai" se ata o le Atua e mata'utia ma le malosi faafitafita (military prowess), ma o le Atua e faamaoni i lana feagaiga ma lana tagata. E peiseai o le malosi lea ua avea ma ala e tumau ai i lona faamaoni i le feagaiga, talu ai le agasala ma le tumau o le nuu o Isaraelu i lea lava feagaiga.

E ala foi ona faatino le malosi lea o le Atua, ona ua tagi le nuu o Isaraelu. Ua mana'omia le faasa'oloto mai le taotaomia mai nisi pulega sau. O i la e ta'oto ai le finagalo o le Atua i le tusi o

Esoto: o le pologa o lona nuu na ia osi feagaiga. Ma o lea ua finagalo ai le Atua ina ia 'ui ane' pe 'sosopo' foi, ina ia lavea'iina ai lona nuu. O lana matafaioi lea i le feagaiga, o le lavea'iina o Isaraelu pe a mafatia.

O le molimau a se tasi o tagata suesue iloga o le Feagaiga Tuai, o Walter Brueggemann, na amata lava le tusi o Esoto i fetalaiiga malolosi a le Atua, e faaataata atu ai o ia lava o le a aumaia le nuu o Isaraelu mai Aikupito, e pei ona ia fetalai i le Esoto 3:7-9. Ae peitai ina ua oo i le fuaiupu e 10, ua le afio le Atua, ae ua alu Mose: "O lenei, ina sau ia, ou te auina atu oe

*faaauau itulau e 11*

# O le Atua na To'ai Faa-I'a a Po

## O se Faitauga o le Esoto 12:12-13

*mai le itulau e 10*

ia Farao ina ia e aumai lo'u nuu o le fanauga a Isaraelu mai Aikupito." Ae ina ua oo mai le faitau i le mataupu e 12, ua le toe iai se malosi'aga o Mose, ua gata foi sona iloa, ae ua ui ane poo ua sosopo loa le Atua. Atonu o se naunauta'iga foi lea i le tusitala, ina ne'i mea ane ua iai se manatu, o Mose na aumaia le fanauga a Isaraelu mai Aikupito, ae o loo faamanino e le tusitala o le Atua lava na na aumaia.

### 5.1 O le Atua na To'ai faa-I'a a Po: O le Atua na faalava le amoa

O le faamata'u na faia ia Aikupito, pe a fua i le ola o i latou ua le taualoa ma taotaomia, e tele se fesiligia. Pe tonu ea le taia e le Atua o i latou ua le sala? Ae o le faamoemoe lea o le Atua na to'ai faa-i'a a po, e peiseai na faalava le amoa.(16)

O le uiga o lea alagaupu, o le togisala a le isi, ina ia magalo pe laveaiina ai le isi. E faapena le uiga o le Atua o loo aumaia i le Esoto, e ui ona o nai tagata Aikupito ua aafia ona o lenei mala, ae o loo faataua e le tusitala o Esoto le Atua na faalava le Amoa, o le Atua na faalava e lavea'i lona nuu. O se manatu autu lea i le tusi o Esoto, o le feagaiga i le va o le Atua ma lona nuu. Ma a fua i le feagaiga, e mamafa lava i le Atua le feagaiga, e ui ina foliga e le taua ia Isaraelu i nisi taimi. O le mafuaaga tonu lea na to'ai faa-i'a a po le Atua i Aikupito. O le Atua na tuua lona nofoaga faalelagi, ae sosopo i Aikupito, ona o le laveaiina o lana tagata na osi feagaiga. Ua sosopo aua o le Atua e pule lava ia i le mea e afio ai, aua le faataunuuiina o lona finagalo pa'ia. O le Atua na to'ai faa-i'a a po, o le Atua silisiliese lava lea!

### Manatu Faai'u

E fia faamamafa i manatu faaiu, le taua o le tagata faitau i le faauigaina o le tala. E ao ona silasila toto'a i vaega uma o le tala. I le faitauga faa-i'a a po, ua iloa ai e lua lava vaega e tatau lava ona oo iai le faitau: o le *avanoa* (*opportunity*) ma le *faamata'u* (*threat*). O se avanoa lea ina ia amana'ia uma ai leo oi le tala, e le gata

o leo o loo maua le avanoa e ola ai, a o leo o aafia i le faamata'u, ina ia manino atili ai le feau o loo faamamafa. O le feau la i le Esoto e 12, o le Atua osi feagaiga, *na to'ai faa-i'a a po* i le nuu o Aikupito, ina ia laveaiina ai lona nuu o Isaraelu.

O le mea moni lava, e ui ina taia Aikupito, ma aafia ai le ola o e le taualoa, ae o le aafiaga lava lea o le taulaga e faia i le toto (blood sacrifice). Ma o se isi foi lea vaaiga i le mala lona sefulu e faatupu ai manatu, o se taulaga toto, na ofoina ina ia

**published with permission from The Malua Theological College**

## Iosefa Atisone - Joseph Addison *Le Tusitala Pupuu na Fiafia i le Salamo e 23*

O Iosefa Atisone, o se tasi o tusitala pupuu o Egelani i le vai taimi o le senituri e 18. Sa taumafai e ofi atu i pulega faa-polokiki - faigamalo, a o le faalavelave, o le tagata e matua matamuli lava, e ui lava na oo i le tulaga o le aveva ma minisita o le kapeneta.

Se aso i le tauaofiaga a le palemene, na ia tula'i ai i luga e taumafai sana lauga i le fono, ae tau nanunanu mai lana tautala, taletale, faamalulu i le maota ma sui usufono, ma le uma ai lava le lauga, ona nofo ai lea i lalo, e le'i toe tu lava i luga e lauga i ona aso na totoe i le palemene.

Ae fai mai le tagata e igoa ia F.S.Boreman, o Atisone e lua mea e matua fiafia lava iai. E matua fiafia lava i lafanua, o vaitafe ma alia o lona nuu; ma le isi, o le Salamo e 23. O le mafuaaga lea na ia faamatalaina ai le Salamo e 23 i se isi ana tusitusiga, faapea ma le Salamo e 19, ma o ia faamatalaga o ia Salamo e lua, na lomina i le nusipepa o le *The Spectator Magazine* i le tausaga e 1712.

Fai mai tala, na amata a'oa'oina e Atisone le Salamo e 23, a o siisii o ia i vae o lona tina. Ina ua tagata matua o ia ma ua aveva ma tusitala iloga o lona atunuu, na ia faaalina ai lona matua fiafia i le lelei o le tusiga, ma le fatiga, faasolo ma faapese o le Salamo e 23.

laveaiina ai le tagata. Aua o le toto o le faailoga o le faamamaina ma le faapaiaina. Ma o le taulaga pito sili ona taua i le tapuaiga faa-Iutaia, o le taulaga toto e faia i le manu (Esoto 12:5-9). E faamausali foi e lea tala le taua o le toto o Keriso, o le toto na togiolaina ai le lalolagi. (1 Ioane 1:7). O le taulaga a le Atua na faalava le Amoa, ina ua faalava aao o Keriso i le satauro, ina ia maua ai le ola, ma maua atili ai lava. Amene.

(16) *O le upu e mafua mai i le fasiga o le aiga sa Tagaloa i Fagaloa e Lu Fasi Aitu. Na faalava pe na ta'oto faalava ai le tama'ita'i e fai ma togisala ma utu ai le ma'ema'ea o Lu.*

Na maofa foi o ia i le lagiina e Tavita o le Salamo, ma aumai ai ona lagona loloto e uiga i lo la va ma lona Atua.

Na viiviiia foi e le isi tagata iloga, o Lord Thomas Macauley, ia Atisone e uiga i ona lagona tau i le Salamo e 23, ma ia fai mai - "O Atisone o se Kerisiano na matua fiafia i le Salamo e 23, o loo faaalina mai ai le Pule o mea uma e pei ona faatino e le Leoleo Mamoe Lelei, o lana laau ma lona tootoo e tuliuli mai le lafu mamoe mai luga o mauga ma vanu i fanua lafulemu ma le vaomu'a, ma leoleo ai foi latou mai manu fe'ai e lana laau.

A o ta'oto o ia i lona moega ua lata i lona oti, a ua 47 ona tausaga, na ia lauina mai ai le Salamo e 23:4: "

E ui lava ina ou savali i le vanu o le ata o le oti, ou te le fefe lava i se mea leaga; aua o oe ta te faatasi ma au, o lau laau ma lou tootoo e faamafanafanaina ai au."

Ua iloa lava e Atisone o le a oti o ia, ona ia amia ai lea o le tane a lona afafine, o Warwick, o se mamoe ua se, ma fai iai: "Vaai mai oe i le oti to'a ma le filemu o le Kerisiano."

*Avatu ia te ia le fua o ona lima; o ana galuega foi e viia ai o ia i faitoota. -  
Faataoto 31:31*

# FA'ASOLOGA FONO TELE 2018

## MALUA, ASO 14 - 25 ME

### “O LE AGAGA O LE ATAMAI I GAGANA”

*“The Spirit of Wisdom in Languages”*

*(Galuega 2:4 )*

<u>ASO</u>	<u>TAIMI</u>	<u>FONO &amp; SAUNIGA</u>	<u>NOFOAGA</u>
<b>ASO GAFUA</b> 14/05/18 -	7.00am 10.00am 1.00pm 7.00pm	Asiasiga Komiti Atinae Komiti Mataupu Tau le Aufaigaluega Fono Komiti o Atinae Lotu Talosaga Au Toeaina <i>Taitai: Iosefa Tui FT</i>	Fale Mafutaga Fale Senetenari Fale Iupeli <i>Hawaii</i>
<b>ASO LUA</b> 15/05/18	8.00am 9.00am 7.00pm	Komiti Au Toeaina Komiti o Aoga Faletua Au Toeaina Komiti Faamisionare	Fale Mafutaga Fale Senetenari Fale o Tina Fale Mafutaga
<b>ASO LULU</b> 16/05/18	8.00am 9.00am 2.00pm 7.00pm	Komiti o Feau Eseese Komiti Au Taumafai Komiti o Tupe TPT: Tautua Puapuaga o Tagata Komiti o Feau Eseese Lotu Au Taumafai <i>Taitai: Penaia Europa FS</i>	Fale Senetenari Fale Mafutaga Fale Fono Fale o Tina Fale Senetenari Fale Iupeli <i>Iuotane</i>
<b>ASO TOFI</b> 17/05/18	8.00am 9.00am 1.30pm 7.00pm	Komiti o Tupe Komiti Au Leoleo Lotu Mafutaga Tina TPT: Teine Papauta Tuai Lotu o Nu'u Ese <i>Taitai: Vaelua Patu FS</i>	Fale Senetenari Fale Mafutaga Fale o Tina Fale o Tina Fale Iupeli <i>Manukau</i>
<b>ASO FARAILE</b> 18/05/18	5.00am 9.00am 2.00pm 7.00pm	Lotu Au Leoleo <i>Taitai: Faatauoloa Maula FT</i> Mafutaga Tina Komiti o Tupe Komiti o Tupe Fono Malua Tuai	Fale Iupeli <i>Apia i Sasa'e</i> Fale o Tina Fale Senetenari Fale Senetenari Fale Mafutaga
<b>ASO TOONAI</b> 19/05/18	9.00am 2.00pm 7.00pm 6.00pm	<b>SAUNIGA O LE FAAUUGA</b> <i>Taitai: Lucky R. Slade FT</i> <i>Faitau Tusi Paia: Siolo Tauati FT</i> <i>Tatalo: Lauie Lupematasila FT</i> <i>Faaeelima: Lucky R. Slade FT</i> <i>Tunumoso S. Iosia FT</i> <i>Tavita Anesone FT</i> <i>Liki Tiatia FT</i> <i>Tauaaga Mataafa FT</i> <i>Tuuina atu Aoao: Iosefa Uilelea FT</i>	Fale Iupeli <i>Aukilani</i> <i>Apia</i> <i>Kuiniselani</i> <i>Taitai Sauniga</i> <i>Taitaifono Fono Tele</i> <i>Taitaifono KAT</i> <i>Amerika</i> <i>Kuiniselani Saute</i> <i>Failautusi KAT</i>
<b>ASO SA</b> 20/05/18	9.00am 6.00pm	Lotu mo Tupulaga <i>Taitai: Faasalafa Alaovae FS</i> TUFa FAILA A USUFONO LOTU TAEAO/FAAMANATUGA <i>Taitai: Kaleve Leifi FT</i> LOTU TAEAO/FAAMANATUGA <i>Taitai: Malifa T. Malifa FS</i> LOTU AFIAFI	Fale Iupeli <i>L-L-Aleipata</i> Fale Fono Fale Iupeli <i>Faasaleleaga</i> Fale o Tina <i>Niusaelese</i> Fale Iupeli

*Taitai: Nomeneta Simanu FT*  
LOTU AFIAFI  
*Taitai: Tuia Peseta FS*

*Aana*  
Fale o Tina  
*F-S-Siumu*

**21 - 25, USUIA LE FONOTELE**

**ASO GAFUA** 7.45am  
**21/05/18**

Tapuaiga Amata  
**Taitai: Tunumoso S. Iosia FT** (*Taitaifono*)  
**Pepa: Dr Tavita Maliko** (*Kolisi Faafaiifeau Malua*)  
Amata Tualumaga o le Fono Tele.  
Malologa mo Taumafataga o le Aoauli.  
Faaauau Tualumaga o le Fono.  
Malolo le Fono  
**Faafiafiaga Tupulaga Faasalaina - Olomanu**  
**(Polokalame F--Misionare)**

**ASO LUA** 7.45am  
**22/05/18**

Tapuaiga Amata  
**Taitai: Situfu Tanuelu FT** (*Penisione*)  
**Pepa: Fili S. Matalavea FT** (*Au Toeaina*)  
Tualumaga o le Fono Tele.  
Malologa mo Taumafataga o le aoauli.  
Faaauau Tualumaga o le Fono  
Malolo le Fono  
**Pepa: Benjamin Beger** (*Messianic Jews*)  
**Folasaga: Sosaiete Kanesa i Samoa**

**ASO LULU** 7.45am  
**23/05/18**

Tapuaiga Amata  
**Taitai: Alaovae Alaovae FT** (*Penisione*)  
**Pepa: Lila Elekosi** (*Mafutaga Tina*)  
Tualumaga o le Fono Tele  
**SAUNIGA ALOAIA AU PENISIONE** (*Fale Iupeli*)  
**Taitai: Tunumoso S. Iosia FT** (*Taitaifono*)  
Faaauau Tualumaga o le Fono.  
Malolo le Fono.  
**Pesepesega & Siva Faaleagaga:** (*Autalavou EFKS Lano*)

**ASO TOFI** 7.45am  
**24/05/18**

Tapuaiga Amata  
**Taitai: Iupeli Ieremia FT** (*Penisione*)  
**Pepa: Manu Maugatai TT** (*Apia i Sasa'e*)  
Tualumaga o le Fono Tele  
Malolo mo Taumafataga o le aoauli  
Faaauau tualumaga o le Fono  
Malolo le Fono  
**Feiloaiga Au Toeaina & Aufaigaluega Faifeau**

**ASO FARAILE** 7.45am  
**25/05/18**

Tapuaiga Amata  
**Taitai: Tunumoso Soliola Iosia FT** (*Taitaifono*)  
**Pepa: Tupulaga Talavou** (*Hawaii*)  
Tualumaga o le Fono Tele

**TAUALUMAGA O LE FA'ASOLOGA O LE FONOTELE:**

- 1 Faamaonia Iugafono Fono Tele**
- 2 Mau Tuu Sao mai Matagaluega**
- 3 Mau Tuu Sao mai Komiti Tetele e Ono a le Ekalesia**
- 4 Faamaonia Galuega a Komiti**
  - i. Komiti o Tupe
  - ii. Komiti o Feau Eseese
  - iii. Komiti o Aoga
  - iv. Komiti o Atinae
  - v. Komiti Faamisionare
  - vi. Komiti Au Toea'ina
- 5 Palota Failautusi Aoao**
- 6 Palota Teutupe**
- 7 Palota Sui Taitaifono**

**FAILAUTUSI**

**Ua iloga lana tane i  
faitotoa, pe a saofa'i  
o ia faatasi ma  
toeaina o le nuu.**  
Faataoto 31:23

# O E UA FAI'ILAGI LE FOLAUGA

## TULIAUPUPU FATA LUPEMATASILA PALA LIMA

29 Novema 1933-13-Mati 2017

Na faa-ekalesiaina i le aso 24 Tesema 1961, ae na avea ma Tiakono i le 26 Mati 1967. Na faaipoipo atu ia Talaetau Leota i le aso 20 Aperila 1957. O ona matua o Maumalo Moe Pisi Alaivaa Limā o Letogo ma Fa'atiga Fata Limā o Afega. Na tu'umalo le faletua o Talaetau Tuliapupu Pala Limā i le 18 Aperila 2008.

E to'atolu ona uso, ae to'avalu ona tuafafine. E 20 o la alo, 62 fanau a fanau, 25 fanau a fanau a fanau. O le afioga ia Tuliapupu Fata Lupematasila Pala Limā o le Tiakono matua ao sinasina, o le sa'o foi o lenei nuu. E lauiloa lona soifua galue i le malo, kamupani ma le aufaipisinisi. O le su'etusi fa'amauiina a Samoa (Samoa Society of Accountants) Sa galue lava foi i lana pisinisi su'etusi. Pala Limā Accounting Firm i lona soifuaga atoa. O se tama sa lei vaai sona gasegase, e maloloina ma tino malosi; e masani ona savali faamalositino. E ui lava foi ua silia ma le 80 tausaga o lona soifua, ae sa galue pea i lana pisinisi; seia oo ina valaauina o ia e lona matai. Sa fai o ia ma sui o Komiti Faatonu i Matagaluega ma Faalapotopotoga a le Malo, e pei o le Apia Park Board, Tau i Faalavelave Fa'afuasei (ACC), Fa'alapotopotoga o Fale a le Malo (Samoa Housing Corporation) Faalapotopotoga o Tausi Unite a Samoa (Unit Trust of Samoa).

O mata felefele lea o le tautua atunu'u, tautua malo a le tamā nei, e faamoemoe iai i lana tofa, faufautua, ma ona agavaa, auā le manuia o Samoa ma ona tagata. Sa avea foi o ia ma pulenuu

o lo matou nuu o Letogo mo tausaga e tele.

E pele i lona finagalo le nuu, e tausī nuu, e fai faleupolu e pei o Tuisamau. E toaga i le Lotu ma malosi lona soifua faaleagaga. Na ia ofoina le fesoasoani e toe fausia ai le faapaologa o lo matou falesa, na faaleagaina i le mafuie o le 29 Setema 2009. Ai lava o lana faaloga ua gasegase, na si'itia ai o ia i Moto'otua ma saili togafiti atu ai i Niu Sila. E sili ma le vaiaso o taoto i le Maota Gasegase i Middlemore Aukilani ma tuumalo ai i le 11.00 i le taeao – 13 Mati 2017.

Na taunuu mai lona tino maliu i le Malae Vaalele i Faleolo i le 2.30 i le afiafi; 18 Mati 2017, faatasi ma nisi o uso ma tuafafine, o alo foi ma fanau, ma fanau a fanau tainane o le to'atele o lona aiga o aumau i Niu Sila.

Na faatalia e le mamalu o tamalii ma failauga o lo matou nuu, mamalu o le Kolisi Faafaifeau i Malua, Sui Pule Rev. Alesana Eteuati (FS), Susuga i faiaoga ma faletua, faapea le vasega o faaiuso, Susuga i a'oa'o ma faletua, tauanuufaiga ma lona aualuma, faapea uo ma aiga, aufaipese EFKS Letogo. Sa ou saunia le tatalo, ma tuua ai loa le malae vaalele. Na faaalua ai foi le faaaloalo maua luga Tuisamau i le leoina mai o le molimoliga mai o le tino maliu o le afioga ia Tuliapupu Fata Lupematasila Pala Limā, ma le agai atu i le malumalu EFKS Letogo mo lona uluai sauniga na faatautaia e ana faafegaiga; EFKS, Katoliko, Au Paia o Aso e Gata Ai.

Sa ou taitai ma faaopoopo i le upu faamafanafana. Maiava Neemia (E. M Uarota II) sa tatalo, Faamanu Okesene ( E.M Uarota I) sa fofogaina Afioga Paia a le Atua, Kolio Lesā (F.K) sa saunia le upu faamafanafana.

O le maea ai o ona sauniga amata, na toe molimoli atu ai lona

tino maliu i le Falemaliu o Pau Sefo Pau. O le Aso Sa, 26 Mati i le 2.30 i le afiafi na molimoli mai ai lona tino maliu, ma matou lolotu faatasi ai i le taimi masani o le Tapuaiga o le Aso Sa. Sa ou taitai ma fai le lauga, Talifeau Seumanutafa Malaki (A.F) sa faitauina le Tusi Paia, Tapalao Vaa (AF) sa saunia talosaga.

Ina ua maea le sauniga o le Aso Sa, sa faaauau ai loa ma le sauniga faale-aiga. E ui lava o le aiga o faifeau, ae sa latou faaaloalo pea ou te ta'ita'i. Na amata molimau i ona uso ma tuafafine, faasolo ane ai i alo ma nai a latou fanau, o aiga ma uo, tainane foi o lo matou nuu. Na auga molimau i le tamā; e fai uso, tuafafine, e alofa i lana fanau ma a latou fanau, o aiga , uo, tainane foi o lo matou nuu. E lototele, finau, osi aiga, e faaaloalo, e le malolo e saili ma taumafai. E faasoa lona silafia mo mea e lelei ai. E fai mea lelei, ma atagia ai lona soifua atia'e. O e na molimau ma sauniga i le sauniga faale-aiga e 78. O le sauniga faale-aiga pe a ma le 7 itula; ae o le molimau moni lea, o le soifua ma le pele i loto ma faamoemoe o le tamā ua tu'umalo.

O le maea ai o le sauniga faale-aiga, ona mapu atu lea o le tamā i lona maota i Lalotea e tofa ai. O le afiafi o le Aso Gafua na feagai ai ma leoleoga ma sauniga faamafanafana- Worship Centre, Kolisi Faafaifeau i Malua, EFKS Leusoalii, EFKS Alamagoto, Katoliko, Au Paia o Aso e Gata Ai, EFKS Letogo, sa auai foi tauanuufaiga ma lona aualuma i pesepesega malie o le po.

O Toe Sauniga, sa feagai ma le Pulega a Vaimauga i Sasa'e Ta'ita'i Aila Patea (FT), faaulufaleina o le sa o le tamā Tanoalei'a Tunupopo (FS); Irenio Tagalao (FS) sa fofogaina le Tusi Paia; Sepi Gafa (FS) sa saunia

*faaauau itulau e sosoo ai*

# O E UA FAI'ILAGI LE FOLAUGA

## Tuliaupupu Fata Lupematasila Pala Lima

*mai le itulau e 14*

talosaga; Pita Toleafoa (FS) sa Lauga ma faaopopo le Susuga i le Ta'ita'i.

Sa molimau le Afioga i le Alii Palemia; Susuga Tuilaepa Sailele Lugesoliai Malielegaoi, i le galue faamaoni o leni tamā i le galuega suetusi, o se tasi foi o uluai Samoa ua tulai mai i lea faiva. O le Susuga Rev Maafala Limā (FS) Pule Kolisi i Malua sa molimau e fai ma sui o le fanau. Lima Maposua Fealofani (AK) sa fai ma sui o le aiga, Nerid Limā sa fai ma sui o fanau a fanau. O le afioga i le usoolii ia Lautafilimai Paulo sa molimau mo le nuu. Sa ou molimauina i le soifua o le tamā i totonu o le Ekalesia ma faaii ona sauniga i lona oliolisaga lona maota i Lalotea.

Sa auai le Ao Mamalu o le malo; Afioga Tuiatua Tupua Tamasese Efi ma lana masiofo, Ta'ita'ifono Komiti Au Toeaina Rev Tavita Anesone FT, Sui

Ta'ita'ifono Fono Tele Rev Tunumoso Soliola FT, Susuga i Toeaina tamā Penisione Malolo; Susuga Sui Pule Rev Alesana Eteuati FS, ma Susuga i Faiaoga ma Faletua le mamalu i le Kolisi Faafaifeau i Malua; A'oa'o ma Faletua sa fofogaina foi Pese e lua o le sauniga faaii. Susuga i faafeagaiga a Letogo, ma le aufaigaluega a le Atua sa auai foi le Afioga i le Fono a Sui Tofia; Tuiloma Pule Lameko, Susuga i le Palemia Tuilaepa Sailele Lugesoliai Malielegaoi, Minisita o le Kapeneta.

Sa auai foi fa'auluuluga o matagaluega ma Faalapotopotoga Tumaoti a le Malo, Ulu o Kamupani ma le Aufaipisinisi, mamalu o le atunuu, tainane o lo matou nuu i Letogo. Na tutulai foi Tuisamau i faaaloaloga faale-atunu'u i le agai atu ma totonu o le malumalu, faapea le agai atu i le oliolisaga o le tamā.

O le afioga ia Tuliaupupu Fata Lupematasila Pala Limā e leotele ana galuega. Ua 50 tausaga o galue i le Tofiga Tiakono. E agavaa o lona soifua galue, suetusi, faapisinisi, fai-faatoaga. E toaga i le lotu ma sauniga o le Aso

Sa, faapea lotu a le Pulega; i le Aso Sa Talalelei, Faiga Me ma Lotu Aofai. E lima malosai fai mea lelei ma soifua faitaulaga. E tausai faifeau, e tua atu ia te ia tonu fai a leni aulotu ma lo matou nuu.

Sa ia faaaogaina mea alofa, ma ana taleni mai le Atua, e auauna ai. E ta matila ma fua mai lona soifua e ala i ana fanau, Rev. Maafala & Lalokava Lima – Pule Kolisi i Malua, Muliagatele Brian Lima – iloga i le taaloga lakapi, Faatafamanogi Laaulialemalietoa & Heather Tupea Schmidt i upufai o malo ma nisi o ana fanau faipisinisi.

O le tamā sa finauina le saili malo i ana taumafaiga, sa lei faavaivai, auā sa toaga ma faamaoni e fai. Na taulamua foi e faatino. Ua naunau o ia e alu, ia faatasia ia ma Keriso, o le mea e sili ona lelei. E manatua pea oe i au galuega lelei i le nuu ma lau aulotu EFKS i Letogo.

Manuia lau malaga tamā, lau Afioga i le tiakono, Tuliaupupu Fata Lupematasila Pala Limā.

**Lavilavi Soloi (FS)**

**EFKS Letogo**

## SAVEA FUAULI SILAOĀ

10 Oketopa 1925-22 Ianuari 2018

O le Afioga i le alii Tiakono, ma o le toe ulutaia o le nuu ma le aulotu. Na soifua mai 10:10: 1925 ae tuumalo 22: 01:2018.

Na faaiipoipo ma Fetu le alo o Masoe Gaolo i Asau i le aso 28 Fepuari 1959. Sa ta'oto i le maota malii o Pa'u Sefo i Safotulafai e talia ai fanau i atunuu e mamao.

O le Aso Sa 4 Fepuari 2018 i le 3:30 i le afiafi na molimoli mai ai lona sa i le malumalu o Mataniu Feagaimaleata ma amata ai lona


uluai sauniga. O a'u sa ta'ita'ia le sauniga ma fai le molimau faapea ma le lauga, a o le Susuga ia Li'o Tofa Foleni (AF) na fofogaina le Tusi Paia (OT: 1 Tupu 13: 27-32, NT: Roma 14:5-9), ma le Susuga ia Li'o Siaosi (AF) na saunia talosaga. Sa molimau le tina ia Fetu i le la mafutaga, a o Savea Tavita sa molimau e fai ma sui o le fanau, ona faaii ai lea o molimau a le fanau i saafiafiga ma pese a a latou fanau. O le tama matua ia Savea Loto Mataitai na molimau e fai ma sui o le aiga.

O le 10 i le taeao o le Aso Gafua aso 5 o Fepuari lona toe sauniga i le malumalu; o a'u na ta'ita'i ma faia le lauga, a o Li'o Siaosi (AF) na fofoga

ina le Tusi Paia (OT:1 Samuelu 20: 24-28), ma talosaga na saunia e Li'o Tofa Foleni (AF). O Masoe, le tuagane o Fetu na molimau e fai ma sui o le latou aiga, ma le Susuga i le Faafeagaiga EFKS i Faletagaloa, Rev. Vaueli Sanerivi, na molimau i le tautua tuavae a Savea i lona tama i le taimi o lana a'oga i Malua atoa ai ma le osi aiga o Savea na pei ai lava o se uso tu'-ofe o lona tama. Na matou faaii i lona oliolisaga tumau i luma o lona laoa i Taulogomai, ma faamavae ai i le pese faatofa a le au Kerisiano, "Talofa uso e tofaina oe..." Na taulaluga i faaaloaloga sa tu tootoo ai le fetalaiga ia Masipa'u Tili (AF), ma e na o gatasi le futia ma le umele i le fofoga lafo o le failauga, ma le mauuluga mamalu o faaaloaloga.

*faaauau itulau e 16*

# O E UA FAI'LAGI LE FOLAUGA



## SAVEA FUAULI SILAOĀ

*faaauau mai le itulau e 15*

O Savea, o se laau mafala sa

malu ai le nuu ma le galuega a le Atua, aua o lana faautaga sa lago lelei ai le folauga a lona fuaiuala, 'Itu o le Nofoaalii', faapea foi le nuu ma le galuega a le Atua. E valaau le Atua ia Savea, e le'i avea lana faautaga, faapea lana silasila e ui ua afu ma tuu tulu'i lona soifua. E logo i tino matagi lelei i fautuaga ma faamalosi'au a Savea, mo ma'ua i le galuega. Faafetai tele Savea i lou sao taua, mo lo tatou nuu ma le galuega a le Atua. Faamaise le Atua i le tina ia Fetu faapea le fanau.

Esera A. Esera  
(Faifeau Sapapalii)



## Tuliapupu Fata Lupematasila Pala Lima

### O Maturo i le Tala Faasolopito

## Dietrich Bonhoeffer (Ponehofa)

Siamani - 1906 - 1945

*mai le itulau e 7*

le vaega tutoatasi na faaigoaina o le 'Au Toefuata'i Talavou. Na ta'utino e i latou e tutumau i latou i le Upu a le Atua, ae matua tetee i tulafono ma talitonuga o tagata Europa papa'e ma a latou faiga faasaga i tagata Iutaia. Ua avea foi Ponehofa o se tasi o taitai o le Confessing Church. O le tusi lauiloa a Ponehofa - The Cost of Discipleship, (O le Tau o le Avea ma Soo) na ia faitioina ai le 'cheap grace', alofa tunoa taugofie-ua na o se mea e 'alo iai mai faiga pi'opi'o. Na ia ta'ua foi o le osi taulaga e taua tele mo le ola o le Kerisiano."O le tuli'esea, inosia, tuulafoa'ina e tagata, o se vaega lava o mafatiaga o le satauro. Na ia faamatala foi o puapuaga o se vaega o lo tatou vavaeeseina mai le lalolagi. Na ia tusia e faapea, o le satauro e le o se iuga leaga lea mo se ola fiafia ma le faapa'ina, a o se amataga mo le mafuta faatasi ma Iesu Keriso. O le savali i lalo

o le satauro o Keriso, e le o se tulaga e tatou te manatu ai ua leai se faamoemoe o toe iai, a o se faafouina ma se filemu mo le agaga o le tagata. Ma o se fiafiaga aupito maua luga lea.

Na pu'eina Ponehofa ma lafoina i le falepuipui i Perelini i le tausaga e 1943. E ui lava na toe faasaina lona ola ona o le lavea'i a se tasi o ona aiga e maua luga lona tulaga i le malo, peitai o lea tagata na

### Taulaga Ola! Taulaga Tagata!

Na o le 19 lava tausaga o Dan Crawford ae malaga i Aferika, o ia o le tama e toatasi a lona tina. I le uafu o tutu ai ma lona tina e faamavae ai mo lana malaga i Aferika, na faamafanafana atu i le tina se isi olomatua ona o le tama e toatasi o le alu e galue faamisiona, e le iloa pe toe fo'i mai, ae tali ane le tina o Dan: "Na te le'i tuua foi lona Atalii e

tuua'ia foi i le auai i faiga e tetee ai i le faiga malo a Hitila.

O le aso 8 o Aperila 1945, faato'a mae'a lava le sauniga lotu na ta'ita'ia e Ponehofa i le falepuipui i Shoenberg, ae tutu ni fitafita se to'alua ma fai atu: 'Le pagota o Ponehofa, sau, tatou o.'

A o le'i tuua e Ponehofa le malumalu, na faliu o ia ma vaai atu i pagota sa latou falepuipui faatasi, ma mafaufau i puapuaga ua oo i le toatele o latou ona o Keriso, ona fai atu lea iai, "O lo'u i'uga lenei - ae ui i lea, mo a'u lava ia, o le amataga o le ola fou."

mai le tusi:

"Martyrs in History"

toatasi!" E 22 tausaga faato'a toe feiloai le tina ma lana tama. O tausaga e 37 sa galue ai i Aferika na o le tasi lana malologa i lona aiga i Peretania. Na maua i ma'i; ma'i soo ma toetoe a oti ai. O le fiva, o le molemanava i le tele o aso Faaletonu mea'ai, lamatia i sauaga o le ola faapaupau o tagata o le konetineti; ae galue lava. Oo ina oti ai lona atalii e toatasi, ma ia tanuina. Na uma ai foi lona ola, ina ua 56 ona tausaga.